

no. 5
14

DISCOVRS SVR PLVSIEVRS

poincts importants

DE L'ESTAT PRESENT
des Affaires de France.

AV ROY.

M. DC. XXVI.

DISCOVER

THE DISCOVER


THE DISCOVER

THE DISCOVER

THE DISCOVER


THE DISCOVER

THE DISCOVER



L'IMPRIMER A V LECTEUR.

IL y a quelques iours que l'on m'enuoya vn Paquet, dans lequel au lieu de Lettres, ie trouuay ce Discours, sans Non, & sans moyen quelconque de reconnoistre ny l'Autheur, ny le lieu d'ou il estoit enuoyé : Neantmoins apres l'auoir leu, & ayant reconnu qu'il ne pouuoit venir que d'vn tres-fidele François, qui sçait dignement reuerer & celebrer les Belles & Glorieuses actions du Roy, & de cette Grande Reyne sa Mere; I'ay osé à ce subject le publier. **E**N quoy i'ay creu seruir le public, puis qu'il n'est remplý que des faits Heroïques de sa Majesté, & des Generaux Conseils des Ministres de son Estat, lesquels par la Grandeur du courage de ce Grand Prince, & par leur trudence & fidelité, rendront cet Empire le plus florissant de la Terre.



A V R O Y.

SIRE,

C'est le commun sentiment, non seulement de vos peuples, mais encore des estrangers, que la Ville de la Rochelle merite d'estre tenue & regardée comme vn prodige de rébellion, veu que dans vn grand & puissant Estat, tel que le vostre, elle a peu en l'espace de soixante ans maintenir les reuoltes contre cinq Roys,, causer onze guerres ciuiles; & par là venir à tel point, qu'elle aye esté l'unique support d'vn dangereux party, qui sans elle, eust esté il y a long temps dissipé & réduit à neant. C'est ce qui à de tout temps causé vne iuste indignation en mon esprit, & m'auoit porté à faire vne curieuse recherche de l'origine & progrès de ceste puissace extraordinaire, & par quels moyens ceste Ville s'est accreue & maintenue iusques à present; & pourroit à l'aduenir estre rangée à son deuoir. De sorte que i'auois resolu de manifester ce que mes vieilles années m'en auoient appris, & faire entendre à vn chacun.

Comment de Bourg on l'auoit faite Ville: Et ses Habirans tantost Anglois, tantost François, & derechef Anglois, par le traicté de Brétigny, furent finalement par la vertu & industrie de leur Maire Chaudrier, r'attachez à la Couronne de France, du temps de Charles cinquième.

Comment ils estoient monstrez ingenieux & malins, a se bander contre plusieurs de nos Roys, lors qu'ils estoient le plus chargez d'affaires: Cōtre Louys XI. dans les menées de son frere le Duc de Guyenne: Contre Charles VIII. lors que toute l'Italie l'attendoit à Fournoue: Contre Louys XII. durant les guerres qu'il soustenoit pour les Milanois: Contre François I. lors qu'il estoit es plus grandes prises avec Charles le Quint: Contre François II. & Charles IX. en leur minorité: Contre Henry III. armant son frere contre luy: Contre Henry le Grand, prest de venir aux mains avec le Duc de Savoie: Contre le Roy heureusement regnant, auquel ils ont fait trois fois la guerre; la première, pour l'empescher en son mariage, Puis pour vouloir se maintenir en corps d'Assemblée contre ses commandemens: Et en l'année dernière, lors que dans vne profonde paix ils s'emparerent de ses vaisseaux à Blauer.

Comment aux quatriesme, cinquiésme & sixiésme troubles, eux seuls auoient fait reuolter toutes les places de leur party, encore qu'il ne s'agit point de leur pretehdue religion, s'estans vnis avec des Princes & Seigneurs Catholiques malcontens, pour ne perdre iamais occasion aucune de troubler cet Estat.

Comment ils s'estoient portez avec leurs principaux Chefs, leur ayant souuent fermé les portes, comme au Roy de Nauarre, & à Monsieur le Prince, (lequels ils auoient assiegé en son logis, & contraint, pour euitier leur fureur, de chasser les domestiques) & avec les Seigneurs & Gentils-hommes de leur party, lesquels ils ont souuent chassez de leur Ville, accusez de trahison, s'ils n'ont combattu quand ils leur auoient commandé, ou si ayant combattu par leur ordre, ils auoient esté batus.

Comment ils estoient impatients en tous les termes ausquels ils se trouuoient, ne pouuant viure en paix sans recommencer la guerre, & lors qu'ils s'y estoient engagez, voulans avec des promptitudes & presses incroyables, soudain reuenir à la paix, à cause des soupçons entr'eux & contre ceux qui les assistoient.

Comment l'origine de leur Mairie n'estoit qu'un fantosme, & une ombre de ce qu'ils en veulent supposer maintenant, puis qu'on députoit souuent leurs Maires, qu'on les éliroit encor qu'ils fussent absens, & que ne pouuant venir exercer leurs charges, ils subdeleguoient leurs amis en leur place, & les Roys les cassaient, s'ils estoient nommez contre leur volonté, voire que les Parlements annulloient les élections trop brigüées & factieuses, comme ayant tousiours eu droit d'en cognoistre.

Comment ceste mesme Mairie & leur maison de Ville, auoit esté supprimée par le grãd Roy François, l'espace de quatorze ans, le sieur de Iarnac, leur Gouverneur, ayant eu entre les mains l'autorité entiere de leur conduite.

Comment leurs pretendus priuileges, qu'ils eleuent si haut, ne sont cogneus que du temps de leurs rebellions, traduits depuis, sur vieilles pieces fausses & supposées, desquelles ils veulent inferer, contre la verité, qu'ils sont exempts de Gouverneurs.

Comment depuis l'entrée dans ce siecle, tant en paix qu'en guerre, ils se sont monstrez plus forcenez, que iamais, par continuelles desobeissance, par la violence de leurs Magistrats en la Iustice, se barricadans & souleuans contre les Maires, les ayant battus & emprisonnez apres estre sortis de leurs charges, lapidé les Intendans enuoyez du roy, chassé & tué leurs propres Citoyens, continué leurs pratiques avec les

Anglois : Bref fait voir qu'en leurs seditions & reuoltes, ils ont surpassé les Saxons, ceux du Liege, & les Gantois. Toutes ces choses, & vne infinité de semblables, m'auoient porté à dire à Vostre Majesté, ce que les Ministres d'Artaxerxes representoient à leur Maistre, touchant la Ville de Ierusalem: *Nous auons écrit ces choses pour les notifier au Roy, afin que s'il luy semble bon, on cherche au liure de ses Peres. Il trouuera que ceste Cité a esté rebelle, troublant les Rois, & faisant tousiours la guerre.*

Mais ayant veu la paix, j'ay supprimé le tout, estimant estre plus à propos, d'effacer, par vne perpetuelle oubliance, la memoire des malheurs passez, que d'essayer d'irriter le Prince, contre des gens, auxquels il a pardonné, & qui, peut estre, lassez de leur mauuaise conduite, de leurs pertes, ruines & angoisses, voyant qu'on leur veut obseruer de bonne foy, tout ce qu'on leur a promis, pourront se recognoitre. & par leurs humbles submissions, reparer leurs fautes passées. Neantmoins me voyant desia la plume à la main, j'ay voulu, changeant de sujet, discourir de cest Estat, & faire voir, par le bref rapport que ie vay faire du gouuernement present, comme depuis le grand Henry, restaurateur d'iceluy, il n'a iamais esté plus sagement conduit, ny plus courageusement maintenu: afin que les lecteurs, iugeans de ceux qui s'en seront le mieux acquitez, en donnant les loüanges à qui elles sont deuës.

Il faut confesser que la funeste mort de ce grád Roy, nous donna vne furieuse seconssé, & sembloit qu'un accident si extraordinaire, deust traïner apres soy, vne suite de calamitez presque irremediabiles. Ce qui, sans doute, fust arriué, sans la bonne fortune, grande resolution, & heureuse conduite de la Reyne

8
Mere, laquelle, d'une part, comblée d'ennuis capables de luy donner mille fois la mort, & d'ailleurs touchée sensiblement, de la solide affection qu'elle portoit au Roy son fils, dont le bas âge luy faisoit craindre que sans un secours opportun, il auroit de grands maux à souffrir, prit courageusement le timon & gouvernail du vaisseau, agité de beaucoup d'orages: Et pour bien commencer, se servit des mesmes Ministres, qu'elle trouva establis dans les affaires, pensant que leur experience produiroit les effets qu'elle avoit esperéz. Ce qui lui succeda heureusement, tant qu'ils furent vnis & de bonne intelligence ensemble. Mais comme il n'y a rien d'assuré au monde, il s'engendra entr'eux tât de diuorce, que pour en éviter les inconveniens, elle fut contrainte de les éloigner. Et apres divers accidents suruenus depuis, en fin nous auons veu le tres Illustre Cardinal de Richelieu, appelé par sa Majesté au gouvernement des affaires: Lequel orné de qualitez grandement releuées, & d'une admirable capacité d'esprit, poly dans la perfection de toutes sortes de disciplines, a fait voir que Platon s'y cognoissoit fort bien, quand il disoit, le bon heur des Estats & Royaumes, ne consister qu'à estre conduits par des hommes pleins de sapiéce & de sçauoir. Ce que nous experimentons maintenant estre vray en cestuy-cy, lequel a cōmencé, en portât son industrie plus qu'humaine, au releuement de la reputation de cest Estar, venue a tel mespris parmi tous les estrangers, que les vns ne pensoient qu'à l'opprimer, & les autres à l'abandonner, pour n'y trouuer plus l'appuy & la protection accoustumée. Car on ne sçait que trop, qu'on souloit auparauant mener les affaires par artifices & conniuences; Mais maintenant, procedant avec l'autorité, la puissance & la Majesté Royale, on conduit les

les affaires, avec la dignité requise à vn si grand Prince. Et si on fait des Traitez, on conserue la foy & les paroles données, que par foiblesse (de peur de violer ouuertement) on taschoit de voiler, par des interpretations ou euasions captieuses, qui remplissoient vn chacun de défiance & de soupçon. Aussi est-ce à present, que les gens de bien, auparauant abandonnez, trouuent leur place, n'estant besoin que d'estre vertueux, pour esperer, & d'aimer le Roy, pour attendre toutes les choses dont on sera capable. Partant on ne scauroit regarder le lustre & l'éclat de ce gouvernement, rapporté à l'honneur du Roy avec moins de merueille & admiration, que le belliqueux Alexandre faisoit les grâdeurs de Darius, vaincu par le bon-heur de ses armes. Car considerant l'innombrable quantité d'hommes qui l'auoient suiny, les grandes richesses que le gain de la bataille luy auoit acquises, l'or reluisant par tout sur ses tentes & pauillons, s'écria tout rauy, *Que cét homme scauoit regner.* Ainsi venât de voir tout fraichement tant d'armées en mesme temps, sur la Mer, dans l'Italie, dans les Grisons, sur les bords de l'Allemagne, de la Flandre, & en tant d'endroits du Royaume, pour soustenir les oppressez, chastier les rebelles, dompter l'audace de ceux qui pensoient tousiours faire trembler le monde, dissiper des factions prodigieuses, dont la seule pée en fait horreur, Nous pouuons dire avec toute verité, *Que vostre Majesté scait regner*, & faire d'vne France mourante, vne France triomphante, qui remplira les siecles à venir d'histoires, de merueilles passées, eternisant ces noms Majestueux de **L O V I S XIII.** & de **M A R I E D E M E D I C I S**: Le son desquels par les genereux conseils de ce nouueau Ximenez, assistez de la prudence courageuse du Marechal de Schomberg, ont desia es-

clatté comme de coups de tonnerre, en tous les endroits de l'Europe : Et ont appris aux Alliez de ceste Couronne, à ne craindre plus d'estre attraquez : & à ceux qui ont tousiours prétendu l'Empire de l'Vniuers, à cognoistre qu'il leur faut tenir bride en main, & songer plustost à se conserner, que par les troubles & diuisions qu'ils ont accoustumé de semer dans tous les Estats, mettre les leurs dans les risques & hazards, qu'ils eussent esprouuez si on les eust poursuuis.

C'est par tels Conseillers que la reputatiō des grāds Royss'est immortalisée. Ce seront eux, SIRE, qui eleueront vostre gloire & renom si haut, qu'ils vous feront estimer la merueille des hommes; & que dans peu de temps, les peuples vous nommeront comme fit Daniel, le Roy Nabuchodonosor, *le Roy des Rois, auquel le Dieu du Ciel a donné le Royaume, la force, l'Empire & la Majesté.* Et comme vn autre Cyrus, vous vous vanterez, *Que le Seigneur Dieu du Ciel vous aura donné tous les Royaumes de la terre.* C'est pour la seule gloire que cestui-cy combattoit; ayant en l'esprit la lumiere de ceste verité, *Que la renommée vaut mieux que mille thresors.* Et c'est la mesme raison pour laquelle ceux qui vous seruent si fidèlement, ont fait tant d'efforts pour estendre la vostre dans toutes les contrées, par tant de gens de guerre mis sur pied en mesme temps, qui surpassoiēt le nombre de six vingt mille, sans que la plupart de vostre Royaume se soit apperceuë que vostre Majesté fust occupée en nulle part: Qui a fait voir à toute l'Europe, que si tous vos Peuples en fussēt meslez, elle la pouuoit reduire sous ses loix. Et comme tels desseins ont bien succédé, on en verroit souuent d'autres, dont la fin seroit autant glorieuse, que profitable à tout le Royaume, sans les frequentes indispositions de ce

grand Cardinal, qui empeschent qu'il ne peut rendre à V. Majesté la subiection & assiduité qui seroit necessaire pour faire mettre à execution les resolutions prises deuant elle, dont le retardement peut apporter souuent de grands inconueniens. Ce n'est pas que s'il s'apperçoit de quelque danger, qui peut causer quelque notable accident, qu'il n'y accoure aussi tost, & que par vn effort sur soy-mesme, il ne surmonte toutes sortes de difficultez, tirant force de ses infirmitéz, courage de sa foiblesse, & des cris de sa voix, pour se faire entendre quand les autres se taisent: imitant par toutes ses actions la dexterité & loyauté de Ioïada le grand Pontife enuers le Roy Ioas, lequel il deliura de tres-grands perils, le fit couronner malgré les vsurpateurs de son Estat, & le rendit si sage, qu'il est rapporté de luy, *Qu'il fit bien deuant le Seigneur tous les iours que Ioïada le Grand Prestre l'enseignoit.* Il me semble, SIRE, que ses paroles sont comme vne prophetie qui s'adresse à V. Majesté, luy annonçant toute felicité & bon-heur, continuant comme elle fait, de se seruir des conseils de cet Illustre Prelat, qui luy sera en fidelité, conduite & hardiesse, vn autre Ioïada, pour l'esleuer au dessus de ses ennemis, & le rendre comme Ioas, vn Prince valeureux, redouté & chery de tous les hommes. Et ceste prophetie est d'autant plus asseurée en son euenement, que V. Majesté suit l'ordre qui a esté practiqué au gouuernement du peuple de Dieu, ioignant dans vos conseils l'Eglise avec l'espee. Moïse prioit en la montagne lors que Iosué combattoit Amalech: & lors que le mesme Iosué fut destiné pour successeur de Moïse, ce fut avec ceste condition, qu'*E-leazar Prestre seroit de son Conseil, & que tant luy que tout le peuple prendroit direction de sa parole.* Ainsi le practiqua ce grand Roy de Iuda, Iosaphat, vray exemplaire de vostre regne, lequel gouuernoit ses

Estats coniointement par ses Princes & ses Levites, & vn million d'hommes entretenus d'ordinaire pour tenir vn chacun en son deuoir. Telle procédure, SIRE, authorisée par le S. Esprit és sacrez cayers, est bastante pour éleuer vostre Sceptre par dessus tous les Roys qui vivent, & pour faire dire à tout le monde, que vostre puissance se rendra inuincible, non tant par la force de vos armes & de vos finances, que par la saincteté & syncerité d'un bon conseil, qui sert pour establir les solides fondemens d'un siecle d'or à ce Royaume, lequel ne peut manquer de sentir bien tost de puissans effets de ceste cōduitte, au soulagement & reglement qui paroïstra en tous les trois Estats dont il est cōposé.

C'est la seule raison pour laquelle quelques Esprits tenebreux, ne pouuant souffrir l'éclat & la vertu de ses belles intelligences, qui donnent le bransle au ciel de la France, voyant que la force leur manquoit pour résister à ces mouuements, ont eu recours à de tres-pernicieux escrits, faisant publier ces sanglans & iniustes libelles contre V. Majesté, qui ont esté promptement estoppez par la plume du docte & iudicieux Ferrier. Et comme leur malice n'a point eu de bornes, se voyans chassez comme des Harpies, ils ont pris leur vol d'un autre costé, s'attaquans à ce Ministre sacré, dont la ruine en quelque façon qu'elle peut estre leur sembleroit vne grande facilité pour paruenir à celle de V. Majesté, qu'ils s'imagineroient bien auancée, s'ils la pouuoient priuier d'un tel seruiteur, si courageux, si adroit, & si desinteressé. C'est pourquoy comme des insensez dignes d'estre liez, ils ont voulu flestrir le lustre de sa dignité & de son merite, s'en prenant à luy avec vn tel debordement de langue, qu'on ne voit point en leurs escrits, la voix des hommes, mais les hurlemens des demons les plus noirs de l'enfer, qui doiuent demeurer confus de honte, en la deduc-

tion sommaire, que ie m'en vay faire, de ce qui s'est passé de plus important, depuis que V. Majesté l'a appelée au maniement des affaires.

Au commencement, il trouua le mariage d'Angleterre fort peu auancé, & plustost en estat d'estre rompu, qu'accomply, les Espagnols faisant effort de reprendre leurs premieres erres, pour s'en auantager à nostre preiudice, ou à tout le moins nous en empêcher l'execution. Par son adresse, il a rompu leurs desseins, donnant fin à cest ouurage, qui par le temps s'estoit rendu fort difficile. Et quoy que maintenant, il semble que les euenemens, soient esloignez de l'attente qu'on en auoit conceuë, cela ne peut point alterer la bonté du conseil qui s'en estoit pris. Le mariage est le plus sacré de tous les liens, qui soient au monde, puis qu'il nous est représenté par celuy de IESVS-CHRIST, avec son Eglise. Quel moyen plus asseuré, pouuoit-on choisir, pour ioindre & vnir ces deux Couronnes, & conserner entre elles, vne paix de longue durée? Si depuis, des menées & interrests de cabinet, ont changé ces choses, & que des particuliers, pour fomentier des diuorces qui se formoiēt parmy nous, ayent en l'industrie de faire chasser tous les Frâçois, de leurs pays, sous pretexte qu'ils éldignoient l'esprit de la Reyne, de ce qu'on desiroit d'elle; & faire persecuter de nouveau, les Catholiques sur des suppositions ineptes & ridicules; plus aisées à verifiser à Paris, qu'à Londres; Qui est-ce qui eust peu preuoir ces choses, estant produites par le tēps & par la folie des hommes? Non plus que la plus part de ces gēs eussent esté réplis de haine cōtre ce grand Cardinal, par ce qu'il est trop iudicieux à leur gré, & trop clair-voyant contre ceux qui sont portez ala broüillerie? Non plus que le desespoir les eust deu saisir, quand ils virent il y a deux ans, vn homme éloigné

des affaires, duquel ils esperoient de plus auantageuses conditions, que de luy? Non plus que de les voir dépitez de la paix faite en France, parce que ce n'auoit pas esté en la forme & au temps qu'ils le vouloient: & de la voir suiue glorieusement de celle d'Italie, cōtre leur intention, parce que peut-estre, ils n'eussent pas esté marris de nous voir tousiours occupez, pour nous estre plus nécessaires, & pour ne desirer pas trop de grandeur & de puissance à cest Estat?

Qui est-ce qui eust peu coniecturer, que tant d'inquietudes, qu'on leur a veuës depuis vn an, tant de Conseils secrets parmy eux, tant de voyages parmy nous; n'estoient pas plustost des pensées pour le Palatinat, que des desseins cachez, pour nous causer des troubles?

Qui est-ce qui eust peu iuger, que lors qu'on a descouvert ce qui se tramoit en France, on les eust veu grincer les dents contre ce grand Ministre, par ce qu'il procedoit trop courageusement en ces affaires? Qui eust creu, que des particuliers dans vn Estat, eussent osé entreprendre tant de choses, & par des deguise mens enuers leur Prince, l'engager par surprise, en des actions que son bon naturel luy fera haïr quelque iour: & peut-estre, ceux qui les luy ont fait cōmettre? N'estant point vray semblable qu'un cœur vraiment Royal, cōme le sien, eust peu se porter de son mouuent en des changemens si peu attendus de sa sagesse. Toutes ces choses ne peuent entrer dans l'esprit humain, pour les preuoir, & fonder des Conseils, pour les pouuoir éuiter: Il suffit de faire les choses bonnes, les bien considerer dans la Iustice, & dans la raison; Et attendre les succès avec patience, & en sorte qu'on soit préparé à tous les accidens, qui s'en peuent ensuiure. Pour ceux-cy, il en faut bien esperer, & croire qu'on verra bien tost réparer vne faute, qui s'est

peu faire précipitément, que le temps raccommo-
 & que ceste nation voudra que le cours & là suite de
 nostre alliance, corresponde à leurs bons commence-
 mens, où nous les auons veus. avec les Hollandois, ai-
 der au chastiment de ceux qui s'estoiēt reuoltez en ce
 Royaume : Lesquels ayans esté combattus & deffaits
 par V. Majesté, furent contrains de demander la paix,
 apres la perte d'une bataille, de leurs vaisseaux, & de
 leurs Isles. Et ce qui est tres-remarquable en ce mer-
 ueilleux homme, c'est qu'il a sçeu biē mesnager toutes
 ces rencōtres, voire mesme l'infortune de ces gens-là,
 pour la paix de l'Italie, en laquelle il n'y a personne e-
 xempt de passion, qui ne doine admirer son industrie
 à conduire dextremēt vn affaire si important, qui sem-
 bloit ne se pouuoir terminer, sans faire brèche, ou à la
 Religion, ou à l'estat. Neantmoins on a veu avec quel
 iugemēt en vn si glissant passage, il a heureusement se-
 codé les saintes intentions de V. Majesté, pour main-
 tenir & conseruer l'integrité de l'une & del'autre, sans
 aucun preiudice du respect deu à tous les deux. Il sem-
 bloit aussi que sa profession le deust porter à suiure en-
 tierement les volontez de sa Sainteté. laquelle bien
 qu'elle ne les eust, que telles qu'il est conuenable au
 Pere commun des Chrestiens: toutesfois, pour n'estre
 bien informée du fait, & des particulieres procedures
 de ceux qui ont tousiours pris pour fondemēt de leurs
 actiōs le preterite de la Religion, elle vouloit des cho-
 ses qui eussent peu (contre son intention) flestrir l'hon-
 neur de la France: A quoy il a resisté couragement,
 sçachant bien que si le temps present luy en suscitoit
 des haines, à l'aduenir il en receuroit des Couronnes,
 & que ce qui pourroit apporter en cela, quelque de-
 goust à sa Sainteté, seroit par elle mesme, approuué &
 estimé digne de loüâges, comme chose qui retourne-

roït au bien & repos de l'Italie, & à l'affermissement de l'autorité du S. Siege. Et cōme quelques Esprits vouloïent troubler ces affaires, & en retarder l'effet enuers la mesme Sainteté, la faisāt atrester sur certains points qui sembloïent toucher à son hōneur, on cessa de traiter auec elle: & l'industrie de ce bon Genie, puissant à tirer profit de toutes rencontres, fit qu'il se lçeut bien seruir de la negociation, que les Espagnōls mesmes auoient commencée auec l'Ambassadeur de V. Majesté, en laquelle il s'estoit engagé (quoy qu'il n'eust eu aucun pouuoir particulier) pour conclure en vn instant ce en quoy plusieurs moys s'estoient esleuez inutilement. Et le fruit de ceste negociation, a esté si grand, en la forme qu'elle s'est faite, que cent millions d'or, & la vie de cent mille hommes, n'y seroiēt pas à plaindre, veu les gens à qui on auoit affaire, qui vouloient eluder vn traité fait avec la France, sous le pretexte de conseruer la Religion en vn lieu, qu'ils ne pouuoient occuper sans iniustice, cōme si le Roy l'eust voulu destruire, lui qui outre le tiltre glorieux de tres- Chrestie surpasse en Pieté & Vertu, tous les Princes du monde.

Et pour comble de la hardiesse & ferme resolution de ce noble courage, en l'execution des volontez de son Maistre, on a veu comment il s'est porté en la detention du Marechal d'Ornano, qui auoit vne puissance absolue sur l'esprit de Monsieur, en laquelle, non seulement il a suiuy l'inclination & le commandement du Roy, mais lors que l'execution en fut faicte, sur ce qui luy fut demandé s'il en auoit eu cognoissance, il le confessa hautement, montrant qu'aux seruices qu'il rendoit, son cœur incapable de crainte, ne souffroit point vne lasche dissimulation, mesme en vne matiere, qui ne pouuoit pas moins porter, qu'vn tres-grād trouble dans l'Estat, suiuy d'vn diuorce dangereux, & d'vn feu allumé

allumé dans la maison Royale, qu'il voudroit
 plustost esteindre de son sang, que d'en souf-
 frir l'embrasement. Comme tout le monde
 leuoit les yeux & les mains au Ciel, sur l'ap-
 prehension des euenemens, Dieu, en vn in-
 stant, changea les craintes en ioye, Monsieur
 s'estant porté, par sa sagesse, à tesmoigner au
 Roy, & à la Reyne sa Mere, qu'il ne se des-
 partiroit iamais de l'amour, respect & obeis-
 sance, qu'il leur deuoit. Ce qui fut suiuy de
 pareils tesmoignages, que Monsieur le Prin-
 ce fit rendre à sa Majesté: De laquelle on ne
 scauroit assez louer & recommander la fer-
 meté, la resolution & le bon conseil qu'elle
 prit en toutes ces occasions, afin de trouuer
 vn remede aux maux qui sembloient mena-
 cer son Estat: pour lesquels euitier, & dissiper
 tous les nuages qui commençoient à se for-
 mer, elle n'a pas epargné ses propres Freres
 naturels, s'asseurant de leurs personnes: A-
 fin qu'on vist que lors qu'il s'agit du repos de
 son Estat, rien ne le peut retenir; & que tou-
 tes sortes de considerations de sang, de paren-
 té & d'amitié, ne le touchent point, ayant
 pour seul but, le bien de son peuple: Pour le-
 quel maintenir, on le voit à tous momens,
 quitter tous les plaisirs de son âge, pour se
 donner aux peines & aux travaux, dans les-
 quels il a esté continuellement occupé; Et
 dans les perils de la guerre, dans les maladies
 contagieuses & mortelles, qui ont souuent
 remply ses cartiers, ses propres logemens,
 emporté ses domestiques, & ceux-mesme,

qui estoient les plus pres de sa personne & de sa faueur; Et dans les chagrins de se voir contrainct d'vser de la rigueur de sa Iustice, contre son naturel doux & benin, à l'endroit de ceux qui voulans suborner son frere, vouloient renouueller les maux de la France. Qu'elle pitié, de l'auoir veüe preste d'estre consumée de toutes parts, pour l'ambition de quelques particuliers? Quelle pitié, de voir vn si bel Esprit, & vn si grand cœur, que celuy de Monsieur, si capable de rendre des biens indicibles à ce Royaume, preuenü & obscurcy par des tenebres artificielles qu'on luy mettoit deuant les yeux? Ma plume n'est pas assez forte, pour représenter l'horreur d'vn si perniciëux dessein: partant j'en quitte la pensée, pour ne perdre pas ma piste, en cessant de poursuiure les biens que cest Estat possède par les laborieux seruices de Ce noble Ministre.

C'est luy, qui a esté tesmoin des iustes douleurs que le Roy luy faisoit entendre tous les iours, à ses plus secrètes heures, sur la consideration du sang de ses subiects, qui se versoit si souuent, par la fureur des duels, qui remplissoient l'air de sourspirs & de larmes, versées par les vefues qui perdoient leurs marrys, par les Peres qui perdoient leurs enfans, par les enfans qui se voyoient sans Peres: Sang & larmes, qui pourroient en fin attirer l'ire & le courroux du Ciel, sur luy, s'il ne pouruoyoit à vn mal, dont le remede estoit en sa puissance. C'est aussi luy, qui pensa soudain fort serieusement, qu'il falloit mettre la

main à l'œuure, pour satisfaire aux pieux sentimens de son Prince, & oster de son Estat, vn malheur qui auoit causé tant de funestes accidens. Pourquoy faire, se resouuenant des infortunées filles Milesiennes, qui se pensoient immortaliser, en se defaisant elles-mesmes, & qu'on ne pût destourner d'un si tragique dessein, sinon lors qu'on remplit d'infamie, ce en quoy elles constituoient leur principal honneur, faisant obtenir par la honte, ce que l'amour de la patrie, des parens, & la crainte des loix, n'auoit sçeu faire; Se resolut de suiure ce conseil, par ce celebre Edict qu'il en voulut dresser; & oster l'excez de la rigueur contenue dans les premiers, reduisant cestuy-cy, aux pertes de l'honneur, des biens & des charges qu'on possedoit: Dont nous voyons vn si prompt effet, qu'il n'y a plus de doute, qu'en fort peu de temps, nous n'apperceuiions perir ceste detestable coustume, que le diable ennemy du genre humain, auoit establie parmy nous. Ce chastiment d'un fils de Marechal de France, qui a esté despoüillé des honneurs que les longs seruices de son Pere luy auoient fait meriter, pour auoir esté le premier infracteur de ceste sainte loy, seruira d'exemple à ceux qui ne sçauent pas obeir; & retiendra force gens, qui craindront grandement de perdre ce qu'ils possedent, & ce qui est tres-difficile d'acquerir, quand on la perdu. Les bannissemens qui suivent, les chagrins qui se trouuent dans les maisons, apres tant de desastres, sont si sensibles, qu'ils ren-

des hommes pouuoit atteindre. Qu'on en considere toutes les circonstances, ceux qui s'en sont meslez, les pratiques & menees qui s'y sont faictes, les moyens dont on s'est feruy pour en diuertir les esprits, & les animer à y estre contraires, ce qui s'est fait pour y porter l'Angleterre, l'Espagne, la Hollande, partie de l'Italie, les Huguenots, la Cour, les domestiques du Roy; On s'estonnera des ressorts qu'on mettoit en v'sage, pour donner mouuement à vne si grande machine. Et quand on eust voulu remüer toute la terre, & la porter dans le Ciel, on n'eust pas sçeu se donner plus de peine, pour faire cognoistre la grandeur d'une entreprise. Et quand en la premiere race, la Couronne fut transportée à Pepin, & quand en la seconde, Charles le Gros en fut dépoüillé; & quand en la troisieme, Hugues Capet s'en fit le maistre: les preparatifs ne sembloient point plus grands, que ce qui a paru des desseins de plusieurs. Quia fait iuger, combien il importoit de paracheuer ceste action, qui dissipoit tant d'orages, & les desseins de ceux qui dans vn renuersement de toutes choses, vouloient trouuer l'impunité à commettre tout ce que des humeurs déreiglées sçauroient penser. Et c'est ce qui a fait dire à vn homme fort renommé entre les Espagnols, qu'il se voyoit bien que le Roy, non seulement estoit remply de beaucoup de sagesse, mais encore accompagné d'un grand-heur, d'auoir eu dans son regne, vn Conseiller si courageux & si fi-

delle, qui avec tant d'adresse, auoit peu pénétrer des affaires si obscures, & tellement entortillées, qu'à les démesler, il n'auoit pas fallu vne moindre prudence, que la sienne; ne trouuât pas estrange si son maistre l'estime, veu les seruices qu'il luy rend : Louant sur tout, & exaltant sa conduite en ce chef, de n'auoir point voulu donner conseil pour l'accomplissement de ce mariage, comme ayant sceu iuger, combien aisément les choses du monde changent de face, par la diuersité des rencontres; & que ce qui a des fondemens plus solides, est souvent renuersé par la malice des hommes. Ce qui est d'autant plus vray, qu'au temps de la conclusion, il y eut des esprits si meschans, que de vouloir apporter du trouble en vne action si sainte, & faire trouuer du mal & de la crainte, en vne chose où toutes sortes de biens se trouuoient. Cela fut principalement cause qu'il ne iugea pas à propos, de se charger d'un si grand poids, se contentant, avec ceste ingenuë candeur, qui luy est naturelle, de représenter au Roy, toutes les raisons qui l'en pouuoient dissuader, & celles par lesquelles il y pouuoit estre conuié: Afin que par vn choix libre, il se portast à ce qui seroit plus conforme à son humeur, estant vne matiere, où sa Majesté seule pouuoit deliberer, apres auoir entendu les inconueniens, & les biens qu'elle en deuoit attendre, afin que la gloire en fust toute sienne, & ses seruiteurs garentis des succès, desquels autre que dieu ne pouuoit respondre. Et cest

des hommes pouuoit atteindre. Qu'on en considere toutes les circonstances, ceux qui s'en sont meslez, les practiques & menées qui s'y sont faictes, les moyens dont on s'est seruy pour en diuertir les esprits, & les animer à y estre contraires, ce qui s'est fait pour y porter l'Angleterre, l'Espagne, la Hollande, partie del'Italie, les Huguenots, la Cour, les domestiques du Roy; On s'estonnera des ressorts qu'on mettoit en vſage, pour donner mouuement à vne si grande machine. Et quand on eust voulu remüer toute la terre, & la porter dans le Ciel, on n'eust pas sçeu se donner plus de peine, pour faire cognoistre la grandeur d'une entreprise. Et quand en la premiere race, la Couronne fut transportée à Pepin, & quand en la seconde, Charles le Gros en fut dépoüillé; & quand en la troisieme, Hugues Capet s'en fit le maistre: les preparatifs ne sembloient point plus grands, que ce qui a paru des desseins de plusieurs. Qui a fait iuger, combien il importoit de paracheuer ceste action, qui dissipoit tant d'orages, & les desseins de ceux qui dans vn renuersement de toutes choses, vouloient trouuer l'impunité à commettre tout ce que des humeurs déreiglées sçauoient penser. Et c'est ce qui a fait dire à vn homme fort renommé entre les Espagnols, qu'il se voyoit bien que le Roy, non seulement estoit remply de beaucoup de sagesse, mais encore accompagné d'un grand heur, d'auoir eu dans son regne, vn Conseiller si courageux & si fi-

delle, qui avec tant d'adresse, auoit peu pénétrer des affaires si obscures, & tellement entortillées, qu'à les démesler, il n'auoit pas fallu vne moindre prudence, que la sienne; ne trouuât pas estrange si son maistre l'estime, veu les seruices qu'il luy rend : Loüant sur tout, & exaltant sa conduite en ce chef, de n'auoir point voulu donner conseil pour l'accomplissement de ce mariage, comme ayant sceu iuger, combien aisément les choses du monde changent de face, par la diuersité des rencontres; & que ce qui a des fondemens plus solides, est souuent renuersé par la malice des hommes. Ce qui est d'autant plus vray, qu'au temps de la conclusion, il y eut des esprits si meschans, que de vouloir apporter du trouble en vne action si sainte, & faire trouuer du mal & de la crainte, en vne chose où toutes sortes de biens se trouuoient. Cela fut principalement cause qu'il ne iugea pas à propos, de se charger d'un si grand poids, se contentant, avec ceste ingenuë candeur, qui luy est naturelle, de représenter au Roy, toutes les raisons qui l'en pouuoient dissuader, & celles par lesquelles il y pouuoit estre conuié: Afin que par vn choix libre, il se portast à ce qui seroit plus conforme à son humeur, estant vne matiere, où sa Majesté seule pouuoit deliberer, apres auoir entendu les inconueniens, & les biens qu'elle en deuoit attendre, afin que la gloire en fust toute sienne, & ses seruiteurs garentis des succès, desquels autre que dieu ne pouuoit respondre. Et cest

Estranger estoit rauy, quand il ouït raconter
 les paroles de ce sage Prince, qu'il tint pour
 declarer la resolution qu'il en prenoit, qui es-
 toient: *Qu'il scauoit bien qu'on luy pourroit alle-
 guer quelques raisons, qui sembleroient le deuoir di-
 uertir, & luy oster la pensée de marier son frere: mais
 que le repos de son Estat le requeroit, qui luy faisoit
 prendre cest aduis, apres y auoir bien pensé il y a long
 temps. Que puis que ses intentions estoient bonnes, il
 n'en attendoit que de bons euenemens: Et que pour
 des effets contraires, il auoit en main la puissance &
 les remedes.* Ces discours, suiuis d'une infinité
 d'autres tres-prudents, donnerent la fin à cest
 ouurage si contredit, qui fera que ce ieune
 Prince rendra vne eternelle reconnoissance
 au Roy son frere & son Seigneur, de luy auoir
 donné pour femme, vne princesse de son sang,
 vertueuse, belle & riche, élevée par vne Me-
 re, qui a peu de pareilles au monde, en tou-
 tes les qualitez qui peuuent orner vne Da-
 me.

Voila l'estat des affaires generales depuis
 que cest homme Illustre en a eu la principa-
 le conduite, qui me fera plaindre avec le
 Prophete Royal, & dire, *Pourquoy est ce que les
 gens se sont mutinez, & que les peuples ont pensé cho-
 ses vaines? Et demander en son nom, ce que N.
 Seigneur faisoit aux Iuifs, Pour laquelle de ces a-
 ctions est ce que vous me voulez lapider? Et au mien
 Pour laquelle est-ce que vous auez inuenté tant d'im-
 postures? Ce sera peut-estre pour les actions
 particulieres de sa vie: C'est là où ie vous at-
 tendois, calomniateurs, pour vous donner le
 coup*

coup de la mort, & vous voir brisez comme les vagues contre les escueils. Car quel homme a-t'on iamais conneu plus vertueux, plus sçauant, plus eloquent, plus véritable? Qui a iamais mis la Charité (sans laquelle saint Paul ne s'estimoit qu'un aërin sonnant) au point qu'il l'exerce tous les iours? Ceux qui le voyent enuironné en tous les lieux où il sejourne, de plus de deux mille pauvres nourris de sa maison, auront bien de la peine, à croire ces gens qui n'ont monstre leur prudence, qu'à se tenir cachez: estants tres-assurez que si on les cognoissoit, qu'on les courroit à force pour les assommer avec des pierres, comme des bestes enragées, dignes de la hayne publique par leur petulante humeur, qui comme à ces peuples barbares, leur fait maudire la beauté du Soleil. Il luy suffit de sçauoir pour sa consolation, ce que le mesme Prophece Royal dit à telles gens, *Que celuy qui habite les Cieux s'en vira, & le Seigneur se mocquera d'eux*; Et que ce sont des ennemis du public, qui en veulent à sa personne: Qui le fera glorifier avec cest excellent Romain, de ce que ceux qui entreprenēt de se declarer ennemis de l'Estat, se proposent en mesme temps de luy denoncer la guerre: Et que c'est chose ordinaire de voir ceux qui manient les affaires, exposez comme sur vn theatre, à la haine de tous les malcontens. En quoy ie iuge qu'ils sont grandement à plaindre, de ce que leurs meilleures actions sont subiectes nō seulement d'estre oubliées, mais d'estre calomniées par ces Mon-

stes agitez de la fureur de Caïn, meurtrier de
 son frere, pource qu'il estoit plus homme de
 bien que luy. Apres tant de trauaux soufferts
 en bien seruant, il est assure que lors que V.
 Majesté, comme vn autre Asuerus, se fera li-
 re ses Annales, esquelles elle verra tant d'a-
 ctions signalées, tant de soins, tant de veilles,
 pour faire dissiper les troubles du dedans &
 du dehors, & faire étouffer les domestiques,
 Qu'elle tiendra ses traistres Amas pour abo-
 minables, & que ce fidelle Mardochee fera
 eleué en la gloire qu'il merite. V. Maiesté voit
 bien que si on le hayt, & si on fait des desseins
 & des entreprises contre sa vie; ce n'est que
 pour luy estre fidelle, mettant sous les pieds
 toutes considerations, capables de retenir les
 plus assurez, pour vous seruir à vostre gré.
 Ce qui a fait estimer vne grande iustice, ces
 paroles que V. Maiesté a publiées, Qu'elle le
 scauroit bien proteger & deffendre avec vos
 autres Ministres, cōtre tous ceux qui les vou-
 droient attaquer: protestant que vous hasar-
 deriez plustost vostre Couronne, que de souf-
 frir qu'on offensaist ceux qui vous seruoient si
 passionnément; les assurant que vous leur fe-
 riez vn perpetuel bouclier contre toute sorte
 d'offenses, lesquelles pour petites qu'elles
 peussent estre, seroient suiuiues d'une vengean-
 ce si prompte & si pesante, que le carreau du
 Ciel ne le seroit pas dauantage. Cela produira
 de grandes satisfactions, dans les Esprits qui
 desormais ne craindront rien quand il faudra
 seruir, considerant combien ils en receuront

de gratitude & de seureté contre ceux qui leur voudroient nuire.

Deux autres choses ont encor esté receuës avec grand applaudissement. La premiere, ceste declaration que V. Majestaté a fait si ouuertement de gens, qui par vn grand malheur sont tombez en des vices execrables; les méçans de les bannir de la Cour & de son Royaume, & de ne les receuoir iamais à aucunes charges ny dignitez, s'ils ne changeoient de vie. Estant à la verité trop estrange, de voir sous le plus vertueux Roy de la terre, le monde fourmillier en impietez & ordures, telles que iamais les Gétils n'en firent de sēblables.

La seconde, est la forme dont on vſe en la distribution des charges. Autresfois ceux qui pouuoient, les faisoient obtenir à leurs parēs, ou à leurs cōfidens, songeāt à leur particulier & non au seruice du Maistre. Mais maintenāt on pense entierement au seruice du Maistre, & point du tout au particulier. Les parens & les confidens sont les bons seruiteurs du Roi, & qui ont plus de zele & d'ardeur à bien faire. On en pourroit produire plusieurs exemples, & vn suffira pour tous. Nul n'ignore cōbien le nom du mareschal de Themines seroit capable de remuër plusieurs ressentimens naturels au cœur de ce genereux Cardinal, pour la grande playe que son fils a faicte dās sa maison: Toutesfois le cognoissant remply d'eminentes qualitez, qui le rendent propre pour s'opposer contre tous ceux qui se voudroient monſtrer ennemis de l'Estat, & voyant qu'il

n'a autre but que la conseruation d'iceluy, & seruice du Roy; il a mis tout en oubly, pour monstrier que ses pensées ne sont portées d'amour ou de haine, qu'enuers les bōs ou mauuais seruiteurs de sa Maiesté, à laquelle il l'a proposé des premiers pour le Gouuernement de Bretagne, cōme elle auoit fait auparauant, pour commander ses armées en Languedoc & la Rochelle. Ce qui a tellement pleu à V. Maiesté, & à tout le monde qui a sceu ceste procedure, que de là on a pris vne nouuelle assurance, de la grande fidelité & syncerité qu'il tesmoigne pour l'affermissement de vostre Estat, & pour rendre encor venerable la memoire du grand Henry, qui a souuent fait preuues des seruices de ce braue homme. Ainsi la posterité entēdra, que celuy qui tient la place de ce grand Prince, s'est rēdu en tout, digne heritier de ses vertus, veu les grands exploits de guerre que ses premieres années ont produit: Lesquelles auant que représenter, ie m'écrieray avec Isaye, *Escoutez Cieux, & toy Terre presse l'oreille.* & souhaitteray avec Iob, que mes paroles soient grauées avec le fer dans les marbres, pour durer eternellemēt. Demetrius en l'antiquité, se trouua digne du nom de Poliorcetes, preneur de villes: Qui le merita iamais mieux que V. Maiesté, pour le grand nombre qu'elle a reduit sous son obeysance en moins de deux années: Cette action de vous voir passer la Mer pour aller affronter l'ennemy, & luy donner la bataille, à elle sa semblable, Moysē seul sēble entrer en parallele avec

vous cét auantage toute fois vous estant acquis par dessus luy, qu'il la passoit en fuyant ses ennemis, & vous, SIRE, en remplissant les vostres d'horreur & d'effroy. On trouue grandement merueilleux dans l'histoire sacrée, de voir en faueur de Iosué, tomber les pierres du Ciel, qui écrasoient ceux qu'il vouloit combattre; Et du temps de l'Empereur Antonin, son armée perissant de soif, à la priere des Chrestiens qui estoient à sa solde, voir fendre les nuës qui d'un costé versoient de l'eau pour rafraischir l'armée, & de l'autre des foudres si espouuantesables aux barbares, que se mettants en fuitte, ils furent tous égorgés par cette legion, depuis nommée fulminante. Mais quant à moy, ie ne trouue moins estrange, de voir des gens plus forts que V. Majesté, logez si auantageusement que d'un autre courage que le sien ils ne pouuoient estre attaquez, saisis en un instant d'une si grande frayeur, que perdans tout sens & iugement, forcenez & desespererez du son de vos trompettes, se mettre en fuitte comme deuant un autre Gedeon, si espouuantez, qu'il sembloit bien que le coup de la main vengeresse de Dieu les eust frappez.

Quel point de felicité y a-t'il plus grand, que celuy auquel V. Maiesté se trouue maintenant? Un ieune Roy dās la fleur de ses ans, tout chargé de palmes & de lauriers, craint & redouté de ses voisins, aimé & reueré de ses subjets, trespuissant appuy de ses alliez, réply d'une vertu & d'un courage si grand, qu'il estonne tout le monde: marié à une des plus nobles Princesses

de l'Europe. Que peut-on adiouster à cela : si non des acclamations eternelles, tant à V. Majesté, qu'à la Reyne vostre tres honorée Mere, laquelle dans les angoisses de la perte inestimable du grand Henry, dans les trauerses de vostre minorité, dans les guerres & reuoltes qu'elle a courageusement soustenuës, vous a neantmoins si bien peu éleuer & conduire, qu'elle a ce bon-heur, de vous voir maintenant pour fruiet de ses labeurs, plus remply de gloire qu'aucun autre Prince de la Chrestienté. Et comme dans les trauerses de sa vie, elle a eu de grandes conformitez avec ceste Reyne Blanche tant aymée des François, elles les a principalement en ce poinct, d'auoir mis au monde vn Roy pieux, Iuste & vaillant, lequel apres auoir triomphé dans l'Europe, ira comme l'autre, dans l'Asie & dans l'Affrique, y rendre le nom de Louys immortel. V. Majesté est dans le chemin pour y paruenir bien tost, & remplir toutes les nations de la terre, d'une recognoissance de vostre valeur & Iustice, pour subiuguer les ennemis de Dieu & de vostre Estat, & pour faire obseruer les loix qui ordonnent le chastiment aux meschans & perfides, & la recompense aux bons & fideles seruiteurs. A cela seruiron grandement ces excellens Esprits, que Vostre Maieité appelle en ses conseils, qui sçauront si bien suivre tous vos genereux desseins, qu'on cognoistra la verité du dire du Sage, *Que le cœur du Roy est entre les mains de Dieu, & qu'il l'inclinera là part où il voudra.* Ce qui se voit encore, au choix que V. Majesté a fait nouuelle-

ment de ces deux personnages tres-signalez: En
appellant l'un, pour estre Chef de vostre Iusti-
ce, qui est si habitué à bien viure, & par vne lon-
gue experience si clair-voÿant aux Grandes af-
faires de l'Estat, que l'on est assuré qu'il ne peut
iamais faillir, estant si vertueux & si entendu en
sa charge, que l'enuei mesme ne le scauroit blas-
mer, & si courageux aux choses bones, que sans
doute il r'establira la dignité & sainte de vostre
conseil, dans lequel il s'estoit glissé beaucoup
d'abus. Appliquant l'autre, à la Direction de
vos Finances, qu'il ne conduira pas avec moins
de prudence & d'integrité, qu'il a fait par vne
grande Pieté, les affaires de la Relligion en sa
Legation d'Angleterre, qu'il auoit mises à tel
point, que les Catholiques n'auoient iamais
iouy d'un tel repos depuis le schisme. Et les
choses n'en demeuroident pas là: car si Dieu eust
voulu prolonger les iours au Roy avec lequel
il traittoit, il eust fait éclore vne action qui eut
réjouy le Ciel & la Terre: Ce bon Prince ayant
esté porté par luy, à se vouloir reünir à l'Eglise,
n'estant plus retenu qu'aux expediens d'y pou-
voir attirer doucement tous ses peuples. Mais
quels biens ne doit-ont attendre, del'employ
honorable que V. Majesté fait du Duc de Bel-
legarde, pour la conduite de Monsieur, qui va
testmoignant de iour en iour, qu'il n'a rien plus
à cœur que l'honneur & seruice de Vostre Ma-
jesté, & la conseruation de ses bonnes gra-
ces, & de la Reyne sa Mere. A quoy aydera
grandement la digne assistance que luy rēdra ce
personnage notable, nourry & éleué dans le

sein des Roys, doué d'une vertu incomparable orné d'une piété & sagesse non commune, duit & façonné à une cognoissance & experience assésurée dans les affaires. Au reste si venerable en sa douce grauité pleine de preud homme, qu'il a de tout temps attiré à soy le cœur des plus grands, & une crainte respectueuse de chacun. Ce qui fait esperer à tous, que Monsieur l'ayant receu & agréé fauorablement aupres de sa personne; comme vn des plus chers & fauorisez du grand Henry; il l'aymera de cœur, & se portera d'affection à suyure ses bons conßeils: lesquels comme rayons lumineux, emanez du beau Soleil de la Royauté; dissiperont tous les nuages & desseins tenebreux, que certains Esprits turbulens vouloient faire eclorre, si on ne les eust estouffez en leur naissance.

Tout cela, SIRE, avec mille autres benedictions & bons succez, desquels la bonté de Dieu va tous les iours fauorissant les Royaller entreprises de V. Majesté, font que personne ne doute, que vostre Royame ne iouisse desormais d'un tres-parfait repos; & que ceux qui viendront apres nous, se sentiront bien-heureux, de proposer à leurs enfans le tableau Roal de vostre vie, comme vn modele de piété & integrité remarquable, dont la memoire se rendra immortelle en terre parmy les hommes; comme elle le sera vn iour au Ciel, dans toutes l'estendue de l'eternité bien-heureuse.

F I N.